

„Službene novine Federacije BiH“, broj: 3/03

Na osnovu čl. 1, 4, 9. i 25. Zakona o Agenciji za bankarstvo Federacije Bosne i Hercegovine ("Službene novine Federacije BiH", br. 9/96, 27/98, 20/00, 45/00 i 58/02) u vezi sa članom 69. Zakona o bankama ("Službene novine Federacije BiH", br. 39/98, 32/00, 48/01, 27/02, 41/02 i 58/02), Upravni odbor Agencije za bankarstvo Federacije Bosne i Hercegovine, donosi

**ODLUKU
O IZVJEŠTAVANJU O NESOLIDNIM KOMITENTIMA KOJI SE SMATRAJU
SPECIJALNIM KREDITNIM RIZIKOM BANAKA**

Član 1.

Ovom odlukom se propisuje minimum kriterija kojih je banka dužna da se pridržava i Agenciji za bankarstvo Federacije Bosne i Hercegovine (u daljem tekstu: FBA) dostavlja informacije o nesolidnim dužnicima-komitentima koji predstavljaju specijalni kreditni rizik.

Član 2.

U skladu sa ovom odlukom, stavke bilansa i određene stavke vanbilansa banke, koje predstavljaju specijalni kreditni rizik su:

1. dati krediti, drugi plasmani, izvršena ulaganja i potencijalne (vanbilansne) obaveze banke kod kojih je banka izložena ozbiljnoj nemogućnosti naplate i uočenih ozbiljnih finansijskih problema u poslovanju dužnika- komitenta, koji su u skladu sa Odlukom o minimalnim standardima za upravljanje kreditnim rizikom i klasifikaciju aktive banaka ("Službene novine Federacije BiH", broj 3/03) klasifikovani u kategoriju E - Gubitak;
2. izdate garancije i druga jemstva po kojima je banka izvršila plaćanja i po kom osnovu korisnici-dužnici nisu izvršili svoju obavezu prema banci najkasnije za 15 (petnaest) dana od dana kada je banka izvršila plaćanje; i
3. bilo koje potraživanje, bilo koji pokretni ili nepokretni kolateral ili druga poslovna operacija kod kojih je banka utvrdila da joj je dužnik-komitent pokušao ili dostavio ili na bilo koji drugi način prezentirao bilo kakvu nekorektnu ili lažnu dokumentaciju ili informaciju.

Član 3.

Nadzorni odbor je dužan da donese odnosno osigura adekvatan i uspješan program za upravljanje specijalnim kreditnim rizikom banke (u daljem tekstu: program) što uključuje planiranje, donošenje i provođenje:

1. politike za identifikaciju specijalnog kreditnog rizika;
2. procedure za upravljanje specijalnim kreditnim rizikom; i
3. sistem odnosno način izvještavanja o specijalnom kreditnom riziku.

U svrhu provođenja odredaba ove odluke nadzorni odbor je dužan da osigura uspostavu sistema stalnog praćenja specijalnog kreditnog rizika koji:

1. obuhvata kontrolu adekvatnosti i provođenja programa;

2. obezbjeđuje nezavisan nadzor nad stavkama aktive bilansa i odgovarajućih stavki vanbilansa koje se smatraju specijalnim kreditnim rizikom, utvrđuje njihovo postojanje, njihov nivo i nosioce (dužnike-komitente);
3. obuhvata predlaganje korektivnih aktivnosti za eliminisanje identifikovanih problematičnih stavki i preduzi- manje zakonskih mjera.

Član 4.

Banka je obavezna da u okviru svog informacionog sistema uspostavi i sistem za identifikovanje, praćenje i upravljanje specijalnim kreditnim rizikom, u skladu sa ovom odlukom i o stavkama specijalnog kreditnog rizika dostavlja posebne izvještaje FBA.

Izvještaje iz stava 1. ovog člana banka je dužna da FBA dostavlja kvartalno, prema stanju posljednjeg dana izvještajnog kvartala i/ili za izvještajni kvartal, najkasnije 15 dana od dana isteka izvještajnog kvartala.

Izvještaj banke mora da sadrži informacije o transakcijama iznad 10.000 KM i čine ga slijedeće kolone: a) ime dužnika-komitenta, b) osnov zbog kojeg se smatra specijalnim kreditnim rizikom; c) iznos poslovne transakcije i d) primjedba-kratki tekstualni opis.

Član 5.

Na osnovu podataka i informacija prikupljenih putem izvještaja banaka FBA će formirati bazu podataka o nesolidnim dužnicima-komitentima banaka (u daljem tekstu: baza podataka).

Informacije sadržane u bazi podataka su, na pismeni zahtjev, dostupne bankama za koje FBA utvrdi da se u potpunosti pridržavaju odredaba ove odluke.

Po prijemu zahtjeva banke iz stava 2. ovog člana FBA će istoj dostaviti odgovor da li se lice na koje se zahtjev banke odnosi nalazi u njenoj bazi podataka i po kom osnovu. U odgovoru se ne daju informacije o banci koja je dostavila podatke o nesolidnom dužniku-komitentu.

Član 6.

Danom stupanja na snagu ove odluke prestaje da važi Odluka o izvještavanju o nesolidnim komitentima koji se smatraju specijalnim kreditnim rizikom banaka ("Službene novine Federacije BiH", broj 47/98).

Član 7.

Ova odluka stupa na snagu danom donošenja, a objavit će se u "Službenim novinama Federacije BiH".

Broj 01-1-1190-12/02
19. decembra 2002. godine
Sarajevo
Predsjednik
Upravnog odbora
mr. Eldar Arnautović, s. r.